



CROESO I YSGOL CRAIG Y DERYN



'Dysgu heddiw er mwyn yfory'



www.ysgolcraigyderyn.org



CROESO

Dymuna'r staff a llywodraethwyr eich croesawu chi a'ch plentyn yn gynnes i Ysgol Craig y Deryn. Gobeithio y cewch flynyddoedd hapus yn ein cwmni.

Gyda'n Gilydd: Disgyblion – Rhieni – Athrawon

Rydym eisiau i'n holl ddisgyblion fod yn hapus yn yr ysgol a mwynhau awyrgylch ofalgar, trefnus a symbylus fydd yn rhoi y cyfle i bob plentyn i gyflawni ei lawn/llawn botensial. Gobeithiwn wneud hyn drwy sicrhau partneriaeth glos rhwng holl ryngddeiliaid yr ysgol.

Mae cyd-weithio â rhieni yn hanfodol i lwyddiant a hapusrwydd pob plentyn yn yr ysgol. Rydym yn ymwybodol o'r cyfrifoldeb sydd gennym fel ysgol gan fod cynifer o rieni wedi dewis gyrru eu plant i Ysgol Craig y Deryn i dderbyn eu haddysg. Mae'r berthynas dda a chyfeillgar sy'n bodoli rhwng yr ysgol, y rhieni, a'n disgyblion yn un yr ydym yn ei werthfawrogi'n fawr iawn.

Edrychwn ymlaen i'ch croesawu i'r ysgol.



Nodau ac Amcanion yr Ysgol

- Rhoi cyfle i bob plentyn ddatblygu i'w lawn botensial mewn awyrgylch ofalgar a hapus
- Annog plant i fod yn feddylwyr annibynnol.
- Meithrin ymdeimlad o hunan-barch yn ein disgyblion a pharch tuag at eraill yn yr ysgol a'r gymuned ehangach.
- Creu disgyblion sydd yn hyderus o'u sgiliau ieithyddol- yn y Gymraeg a'r Saesneg a'u sgiliau mathemategol a digidol.
- Helpu'r plant i ddysgu am ac i ymfalchio yn eu treftadaeth hanesyddol a diwylliannol.
- Ehangu gwybodaeth y plant trwy gynnig ystod helaeth o brofiadau a chyfleoedd yn cynnwys holl agweddau diddorol o'r cwricwlwm eang
- Rhoi arweiniad ac addysg i'r plant i'w paratoi i fod yn ddinasyddion cyflawn fel oedolion
- Sicrhau fod llais pob unigolyn i'w glywed a bod pawb yn cael eu trin yn gyfartal

Dechrau yn Ysgol Craig y Deryn

Diwrnod cyntaf eich plentyn yn yr ysgol!

- Mae hwn yn ddiwrnod pwysig i chi a'ch plentyn. Gwnawn ein gorau glas i sicrhau ei fod yn un hapus a chofiadwy i bawb.
- Ym mis Medi, gofynnwn i chi hebrwng eich plentyn i brif fynedfa'r ysgol. Bydd aelod o staff yn aros wrth y drws o 1y.h. ymlaen i'ch cyfarch. Wedyn, byddwn yn helpu eich plentyn i ymgartrefu yn y dosbarth.
- Bydd gweithgareddau a thasgau wedi eu gosod o amgylch yr ystafell fel bod eich plentyn yn medru chwarae yn rhydd. Gofynnwn yn garedig ichi ffarwelio yn hwyliog os gwelwch yn dda gan fod plentyn yn medru synhwyro pan fo rhiant yn pryderu! Mae'n debygol y bydd rhai plant yn ddagreuol wrth i rieni eu gadael ar y diwrnod cyntaf – mae hyn yn arferol, ond mae'r mwyafrif yn ymgartrefu yn gyflym. Byddwn yn cysylltu â chi os teimlwn fod eich plentyn yn gofidio ac yn parhau i grio am amser hirach na'r disgwyl. Mae croeso i chi hefyd gysylltu â'r ysgol yn hwyrach yn y dydd er mwyn lleddfu unrhyw bryderon sydd gennych.
- Bydd eich plentyn yn cael 1/3 peint o laeth i'w yfed yn y prynhawn yn rhad ac am ddim. Os oes gan eich plentyn alergedd i laeth, rhown gwpan o ddŵr yn ei le.

Diwedd Diwrnod Cyntaf eich Plentyn

- Pan fyddwch yn casglu eich plentyn o'r ysgol am 03:30y.h, gofynnwn eich bod yn aros wrth ddrws y dosbarth Meithrin. (dilynwch y llwybr dde heibio swyddfa'r ysgol). Bydd aelod o staff yn aros amdanoch ac yn galw am eich plentyn pan gyrhaeddwch chi. Byddwn yn trosglwyddo plant yn ddiogel i'w rhieni / gwarcheidwaid un ar y tro. Os bydd rhywun gwahanol i'r arfer yn casglu eich plentyn o'r ysgol, mae'n **hanfodol** eich bod yn dweud ymlaen llaw wrth yr ysgol, boed drwy alwad ffôn neu lythyr. **Ni fyddwn yn gadael i'ch plentyn adael gyda oedolyn arall heb ein bod wedi ein hysbysu ymlaen llaw.**

Presenoldeb

Rydym yn ceisio sicrhau lefel presenoldeb uchel ar gyfer pob disgybl gan fod absenoldebau yn effeithio ar gynnydd plentyn. Gofynnwn i rieni sicrhau bod eu plant yn yr ysgol erbyn 1:00yh. Os ydynt yn cyrraedd ar ôl 1:10yh yna fe roddir marc bod y plentyn yn hwyr ar y gofrestr. Yn unol a rheolau'r llywodraeth, rhaid i bob rhiant esbonio absenoldeb eu

plentyn/plant o'r ysgol. Dylai rhieni wneud hyn drwy alwad ffôn cyn gynted a phosib ar **ddiwrnod cyntaf** yr absenoldeb. Os nad oes eglurhad yn cael ei dderbyn am absenoldeb disgybl yna fe fydd yn cael ei gofnodi fel 'Absenoldeb Heb Awdurdod.'

Gwyliau

Mae gwybodaeth am wyliau ar gyfer y flwyddyn academiaidd yn cael ei ddsbarthu i rieni ym mis Medi. Ni all y Pennaeth ganiatau cymeryd gwyliau yn ystod y tymor – ag eithrio rhesymau eithriadol. Mae Ysgol Craig y Deryn yn ceisio annog rhieni i beidio cymryd gwyliau achlysurol yn ystod y tymor gan ei fod yn amharu ar addysg yr unigolyn.

Gwisg Ysgol

Yn Ysgol Craig y Deryn credwn fod gwisgo gwisg ysgol yn hynod o bwysig gan ei fod yn cyfranogi at ddatblygiad hunan ddisgyblaeth disgybl yn ogystal a chreu ymdeimlad o berthyn. Mae'n hynod bwysig fod pob un o'n disgyblion yn teimlo ei fod ef neu hi ar delerau cyfartal a'i g/chymheiriaid. Mae gwisg ysgol yn gosod hinsawdd o safonau uchel a threfn yn yr ysgol a gofynnwn am gydweithrediad ein rhieni gyda'r agwedd hon o fywyd yr ysgol.

Ein gwisg ysgol yw:

- Sgert/ ffrog/ trowsus/siorts du
- Crys/ blows wen
- Crys polo plaen coch/gwyn neu gyda logo yr ysgol.
- Ffrog haf gingham coch a gwyn (dewisol)
- Crys chwys/cardigan/siwmper plaen goch neu gyda logo yr ysgol Fleece goch ar gael gyda logo yr ysgol
- Esgidiau du
- Rydym yn annog rhieni yn gryf i wisgo eu plant yng ngwisg ymarfer corff yr ysgol.

Ein gwisg ymarfer corff

- Crys t plaen coch/crys t coch gyda logo yr ysgol
- Siorts plaen du
- Traeneri/dapiau
- Gellir ffonio Lorraine Rodgers yr ysgrifenyddes am fwy o fanylion. 01654710463
- Bydd angen dillad diwrnod gwlyb a phâr o 'wellingtons' ar eich plentyn (i'w cadw yn yr ysgol) ar gyfer ein sesiynau awyragored a 'Dydd Iau Mwdlyd'.
- Gofynnwn yn garedig ichi roi **enw eich plentyn ar bob dilledyn** (gan gynnwys esgidiau) – mae hyn yn golygu y byddwn yn gallu eu dychwelyd i'r disgybl cywir!
- Gallwch archebu eich dillad o'r ysgol – 01654 710463

CYSWLLT CARTREF

Rydym yn sylweddoli fod cefnogaeth rhieni i'r ysgol yn hynod o werthfawr ac edrychwn ymlaen at sefydlu partneriaeth gref rhwng y cartref a'r ysgol.

Themâu

Byddwn yn datblygu meysydd dysgu drwy themâu trawsgwricwlaidd yn unol â gofynion Cwricwlwm i Gymru.

Tasgau Cartref

O bryd i'w gilydd gosodir tasgau cartref yn seiliedig ar yr hyn â ddysgir yn y dosbarth. Gofynnwn i rieni i **helpu** gyda'r tasgau hyn. Yn dilyn hyn, bydd cyfle gan y plant siarad am eu gwaith yn y dosbarth, os ydynt yn dymuno, ac i ddathlu eu llwyddiant. Bydd gwybodaeth am bob tasg yn cael ei yrru gartref gyda'ch plentyn.

PARATOI EICH PLENTYN AR GYFER DECHRAU YSGOL

Sut fedrwn chi helpu eich plentyn?

- Anogwch eich plentyn i ddatblygu sgiliau hunan gymorth ac i dyfu'n annibynnol wrth ddefnyddio'r tŷ bach.
- Dysgwch eich plentyn i olchi ei dd/dwylo ac atgyfnerthwch hyn yn gyson fel ei fod yn tyfu'n weithred naturiol. Bydd hyn yn helpu'ch plentyn i feithrin sgiliau hylendid personol ac i leihau ymlediad heintiau.
- Addysgwch eich plentyn i wisgo a dadwisgo ei g/chot yn annibynnol. Byddwn yn defnyddio'r ardal tu allan yn rheolaidd yn ystod y dydd, drwy gydol y flwyddyn ac fe fydd eich plentyn yn cael ei h/annog i wisgo ei g/chot yn annibynnol a'i dychwelyd i'r bachyn cywir ar ddiwedd y sesiwn.
- Anogwch eich plentyn i dacluso ei b/phethau. Yn y dosbarth, disgwylir i blant ofalu am adnoddau'r dosbarth ac i gymryd cyfrifoldeb am eu dychwelyd i'r lle cywir yn barod i eraill eu defnyddio.

Yn ogystal, byddem ni'n gwerthfawrogi'n fawr pe baech chi yn medru:

- Trafod yr ysgol gyda'ch plentyn – soniwch am yr hwyl sydd i'w gael yno!
- Helpu eich plentyn i adnabod ei h/enw yn ysgrifenedig.
- Darllen llyfrau a gwyllo rhaglenni teledu Cymraeg fel Cyw gyda'ch plentyn.
- Defnyddio apps Cymraeg mor aml â phosib.
- Rhoi cyfle i'ch plentyn ddefnyddio offer creadigol gartref e.e. creonau, pensiliau, papur, glud, siswrn a phaent.

EICH CWESTIYNAU WEDI'U HATEB

- **Beth ddylwn i wneud os ydw i angen trafod fy mhentyn ag aelod o staff?**
Os oes angen ichi drafod gyda'r staff sydd yn dysgu eich plentyn, anfonwch nodyn neu ffoniwch y swyddfa ac fe drefnwn amser sydd yn gyfleus i bawb, ac sydd yn rhoi amser er mwyn trafod heb ymyrraeth.
- **Beth fydd yn digwydd os yw fy mhentyn yn cael damwain tŷ bach?**
Gwerthfawrogn fod damweiniau'n digwydd, a byddwn yn delio â'r rhain yn gyflym ac mewn modd sensitif. Bydd dillad eich plentyn yn cael eu rhoi mewn cwdyn plastig a rhown ddillad ysgol glân iddo/iddi. Gofynnwn yn garedig ichi olchi a dychwelyd y dillad cyn gynted â phosib. Rydym yn awgrymu eich bod yn rhoi dillad isaf sbar ym mag eich plentyn – rhag ofn iddynt gael damwain tra yn yr ysgol. Os bydd eich plentyn yn trochi cysylltwn â chi ar unwaith os oes angen i chi i ddod i'w lanhau a'i g/wisgo mewn dillad glân.

- **Sut fydda i'n derbyn llythyrau/negeseuon gan yr ysgol?**

Awgrymwn eich bod yn edrych ym mag eich plentyn ar ddiwedd bob dydd ar gyfer llythyron neu wybodaeth bwysig arall. Byddwn yn anfon rhan fwyaf o negeseuon ar facebook a Dojo yr ysgol.

- **Pryd fydd fy mhlentyn yn cael gwersi ymarfer corff?**

Byddwn yn anfon llythyr gartref o fewn y pythefnos cyntaf yn esbonio amserlen yr wythnos i chi.

- **Ydi fy mhlentyn yn gallu gwisgo gemwaith i'r ysgol?**

Yn unol a rheolau diogelwch yr ysgol a'r Awdurdod Lleol, dylai disgyblion â thyllau yn eu clustiau wisgo un par o stydiau yn eu clustiau yn hytrach na chylchoedd. Ni chaniateir gemwaith o gwbl yn ystod gwersi Addysg Gorfforol.

Peidiwch â bod ofn holi os oes ganddoch gwestiwn i'w ofyn. Rydym ni yma i helpu!

Rydym yn eich annog i gysylltu â'r ysgol os oes unrhyw beth yn achosi pryder i chi neu'ch plentyn.